



**VIJEĆE FAKULTETA**

Broj: 01-3384/11

Sarajevo, 21.09.2022. godine

Povodom kontinuiranog degradiranja Fakulteta sporta i tjelesnog odgoja Univerziteta u Sarajevu u javnom prostoru, te omalovažavanja studenata, diplomanata, magistranata, doktoranata, uposlenika, javnog minimiziranja stečenih kompetencija alumnih, profesora i sportskih radnika istaknutih u obrazovnom sistemu i sportskoj praksi, stvaranja nepopularne predstave u javnosti o Fakultetu i profesiji koja se stiče na Fakultetu, te napada na vrijednosti, tradiciju, integritet i kredibilitet Fakulteta i svih studenata i diplomanata, Vijeće Fakulteta na vanrednoj sjednici održanoj dana 21.09.2022. godine donosi *sljedeći*:

**STAV I SAOPŠTENJE ZA JAVNOST**

Fakultet sporta i tjelesnog odgoja Univerziteta u Sarajevu je visokoobrazovna ustanova koja baštini tradiciju od 60 godina postojanja i djelovanja, te koja posjeduje akademski kredibilitet i pozitivne rezultate rada. Na hiljade diplomanata djeluje u sistemu obrazovanja i sporta i time daju doprinos razvoju našeg društva. Rade časnu profesiju, podučavaju, odgajaju, vode trenažni proces, organizuju i upravljaju, istražuju, te svoju kompetentnost, znanja i vrijednosti transferišu u društvo. Obrazovanje i odgajanje novih generacija im nije jedina profesija, djeluju u oblasti sporta, sportske rekreacije, sportskog treninga, kineziterapije, rehabilitacije, menadžmenta, organizacije i upravljanje u sportu, sportskih medija i drugim društvenim oblastima. Studijski programi, te kurikulumi na Fakultetu im daju širok spektar kinezioloških i društvenih kompetencija. Prepoznati su na globalnom nivou, što potvrđuje priznavanje diplome Fakulteta sporta i tjelesnog odgoja u svijetu. U Bosni i Hercegovini postoji deset (10) srodnih fakulteta koji se bave oblastima sporta i tjelesnog odgoja, ponosni smo što imamo izvrsnu saradnju sa svima i što zajedno unapređujemo odgojni, obrazovni i sportski sistem, dijelimo iste društvene izazove, pronalazimo rješenja, te stručno i naučno doprinosimo akademskoj i društvenoj zajednici. Fakultet sporta i tjelesnog odgoja je lider među srodnim fakultetima u Bosni i Hercegovini, a međunarodno je prepoznat i regionalno je u izvrsnoj saradnji sa sličnim fakultetima. To potvrđuje međunarodna razmjena studenata i nastavnika kroz Erasmus programe.

Fakultet sporta i tjelesnog odgoja baštini referentnost i vrijednosti koje su historijski prepoznate. Pripadamo najstarijem Univerzitetu u Bosni i Hercegovini, Univerzitetu u Sarajevu. Prve generacije trenera su školovane davne 1963 godine. Naši profesori su bili inicijatori i nosioci Zimskih Olimpijskih igara 1984. godine. Olimpijske igre mladih EYOF 2019. su bile podržane i pomognute nastavnicima i studentima našeg Fakulteta. Nastavni programi I (prvog), II (drugog), III (trećeg) ciklus studija, Međunarodni časopis Homosportikus, Međunarodni simpozij Nove tehnologije u sportu - NTS, simpozij ESPMA, djelovanje Instituta sporta, naučna i stručna prepoznatljivost nastavnog osoblja,

objavljivanje u indeksiranim časopisima, potvrđuju referentnost Fakulteta sporta i tjelesnog odgoja.

Mnogi diplomanti s našeg Fakulteta, alumni su globalno i društveno prepoznati u svim sferama življenja. Svojim radom, prepoznatljivošću i popularnošću promovišu našu domovinu, služe kao primjer mladim generacijama, njihov pozitivni društveni utjecaj je ogroman.

Naši studenti imaju posebnu energiju, mogu i žele više, proaktivni su. Nastavni čas, trening, takmičenje ih priprema i adaptira da se znaju organizovati i da mogu više. Odgovorni su prema svom poslu jer rade sa djecom, mladima i sportistima. Rade uzvišeni posao, pudučavaju i odgajaju. To ih čini odgovornim. Ta odgovornost se s nastavnog časa ili treninga, prenosi i u društvo. Spremni su da se uključe u društveni život, da pomognu, stave se na raspolaganje i preuzmu odgovorne funkcije. Mnogi naši studenti, profesori, sportski radnici, sportisti su prvi stali u odbranu naše domovine, bili ogranizatori odbrane, dali svoje živote, što svjedoči i spomen obilježje ispred zgrade Fakulteta. Nove generacije naših studenata i diplomanata pokazuju spremnost da pomognu našem društvu svojim angažmanom u svim sferama života, to je za svaku pohvalu. Sjetimo se angažmana studenata i nastavnika našeg Fakulteta prilikom poplava 2014. godine, kada su u organizaciji Univeziteta u Sarajevu organizovano odlazili u Maglaj i druge stradale gradove da pruže pomoć.

Na žalost zadnjih nekoliko godina se u javnom prostoru i govoru degradiraju naši studenti, naša profesija, naš Fakultet i svi srodni fakulteti. Degradira se odgojno područje Tjelesnog odgoja, koje je od izuzetnog značaja za svako društvo. Protivimo se takvom govoru i odnosu s ciljem zaštite vrijednosti i spriječavanja nanošenja štete institucijama, pojedincima i društvu u cjelini.

- Ističemo da je Fakultet sporta i tjelesnog odgoja visokoobrazovna institucija sa referentnošću koja je svjetski prepoznata i uvažena te apelujemo na sve one koji je u javnom prostoru degradiraju da to ne čine.
- Odbacujemo i protivimo se javnom govoru koji omalovažava i diskriminira studente i diplomante iz oblasti sporta i tjelesnog odgoja, te time i sve fakultete u Bosni i Hercegovini koji obrazuju studente iz ove oblasti .
- Protivimo se negativnom isticanju profesora sporta i tjelesnog odgoja, menadžera u sportu, sportskih radnika i sportista u javnom prostoru.
- Protivimo se minimiziranju značaja Tjelesnog odgoja i sporta u društvu.
- Apelujemo da se termin "difovac" ne koristi u negativnom i pogrdnom smislu. DIF je bio Državni Institut Fiskulture u Beogradu, što nema nikakve povezanosti s našim Fakultetom. Danas je naziv našeg fakulteta Fakultet sporta i tjelesnog odgoja, skraćeno FASTO.
- Potenciramo i napominjemo da se u 60 godina postojanja Fakulteta sporta i tjelesnog odgoja nikada nije desio slučaj nevalidnosti diplome niti korupcije u sticanju iste.
- Ističemo da se ne može na nezakonit način steći diploma na Fakultetu sporta i tjelesnog odgoja.



- Značajan broj realizovanih inspekcijskih nadzora na našem fakultetu posljednjih godina nije rezultirao kaznama.
- Potenciramo našu otvorenost za bilo koju kontrolu ili nadzor nad našim radom jer smatramo da nam je to pomoć i korektivni faktor u našem daljem radu.
- Fakultet sporta i tjelesnog odgoja je ponosan na svakog studenta, diplomanta i uspješnog pojedinca.
- Ističemo i pojašnjavamo da generacija studenata koja je diplomirala na Višoj trenerskoj školi 2006. godine je imala mogućnost upisa treće (3) godine Visoke sportske škole u peti (V) semestar, po nastavnim planovima i programima za koje postoje saglasnosti nadležnih institucija. Pojašnjavamo da se navedena generacija studenata, njih 266, zatekla u prelaznom periodu iz starog sistema obrazovanja u novi bolonjski sistem obrazovanja, te prošla apsolutno istu proceduru bez ikakvih privilegija bilo kojeg pojedinca u odnosu na ostale, među kojima su studenti spomenuti u javnom prostoru kao i student Elmedin (Galib) Konaković. Proces sticanja diplome svih studenata je bio usaglašen sa tada aktuelnim Zakonskim i podzakonskim aktima, Odlukama Nastavno-naučnog vijeća i nadležnih institucija. Fakultet je ustanova koja funkcioniše po zakonskim osnovama, te svaki student koji upiše Fakultet prolazi sve procedure koje su propisane aktima, koje mora poštovati svaki pojedinac.

Univerzitet u Sarajevu, Fakultet sporta i tjelesnog odgoja posjeduju regionalni i globalni kredibilitet. Angažman naših studenata i diplomanata potvrđuje njihov kvalitet i kompetentnost, kojim promovišu univerzalne životne vrijednosti i domovinu. Insistiramo na uvažavanju svake profesije i institucije, dostojanstven govor i poštovanje u javnom prostoru.

S poštovanjem,

DEKAN  
Prof.dr Haris Alić

